

四庫全書

集部

欽定四庫全書

洺水集卷十六

宋 程秘 撰

致語

建康鹿鳴宴

春日下詔書處蒐揚巖谷秋風動霄漢人人振刷羽
翰一登天府獻賢之書游講公堂勸駕之燕南則七閩
韋布之地東則三吳文物之鄉凡戴堯天盡遵周典唯
是千年之王氣實為六代之帝家自控長江十萬之師

不減秦關百二之勢起一世明堂清廟之老秉九州繡
斧金鉞之權適當大比之時來主賓興之事且問春官
羣試看有此金陵座主無豈非多士之獨榮懸知他郡
之難比新貢省元天與一段秀氣身負千人雋聲能賦
為大夫上薄楚騷之光焰明經補高第下陋漢儒之異
同幾年結就雲梯今日來遊月窟捷書夜至慰辛勤教
子之慈親課誦更闌動多少答兒之鄰父粵有回翔舊
舉騰踏英遊家家自握靈珠步步同登寶塔某官百尺

竿頭饒一步千佛經頂上三人傳誦人間縱橫禮樂三
千字徹聞天上卓犖聲名四百州要從白鷺清溪却步
紫樞黃閣不但秦淮一條水寸波不驚坐令淮甸二十
州高枕安臥腹中自有百萬甲筆陣獨掃千人軍恩意
洽於營屯已嚴武事禮貌優於庠序益振儒風爰因暇
時更舉縟禮屈金鼎調元之手款蟾宮得意之人平時
俎豆雍容已宣禮樂詩書之化今日尊疊閑暇更將笙
簧幣帛之誠某官列宿應郎官使星臨吳地前朝相國

之胄風采自高中興名臣之家典刑故在並擁皇皇之
節來光秩秩之筵旗幟精明賓僚整暇况坐中有鯨海
釣鰲之客而席上皆玉堂吐鳳之人舉酒一言來年三
月大宗伯以姓名來上新進士肅衣冠以前序立大庭
躬承聖問毋如公孫子之阿世其如轅固生之正言凡
異時得君而行之皆今日悉意以陳者又况石城虎踞
鍾阜龍蟠雙闕崔嵬大江吞吐代生人傑氣稟地靈老
鳳飛來尚想半山之松竹靈鼇穩占猶聞東閣之芝蘭

何止狀元宰相之有人且復熙寧紹興之近事勉光前
躅無遜昔時相期來春好在魚翻三級何妨今日且作
鯨吸百川氣壓江淮事光圖牒幸侍北門之宴請陳西
郢之詞

河南貢士紫萸詩不比尋常貢士時一老堂堂強國棟
四筵濟濟瑞庭芝傳聞座主趨璜召恰與諸生赴詔期
宴罷瓊林如謁謝請君懷刺鳳凰池

建康春教

虎城龍阜控長江地勢之雄鐵鉞琱戈侈太府軍容之
盛雖在聖朝偃武之際不妨春田蒐事之常某官制九
州之兵擁七尺之節聲名動蠻貊頃時嘗問於度年威
重懾單于他日更詹於漢相三年管鑰四治戎行百將
同心三軍一勇動搖山嶽呼吸雷風蛇向敵而蟠隱隱
圖中之八陣馬從背而出片片面前之六花進若電馳
退如雨寂幕府山北空餘當日武帳岡朱雀航邊不數
昔人麾羽扇而又適丁今歲一整常須十萬張穉角之

弓三百步僕姑之箭熊旗兕甲影搖汴水之波鶴膝犀
渠光奪燕山之月士氣益倍日暮未酣然萊公乃出填
北門恐不免使人之問使中令若叅決巖廟必令知中
國之威某等久窺投壺之歌頗諳舞劍之樂輒哦韻語
助喜凱旋

朝來百鼓殷軍門知是元戎肅萬屯殺氣直摧龍尾壘
英風遠薄鬪場村從今吳卒精成勇却看燕兵脆可掀
好入廟堂裨聖畧指麾諸將定中原

聖節

乾道盛際夙開夢日之符嘉定熙辰載叶旋乾之度欲
獻魯山之曲盡哀嵩嶽之呼恭惟剛健法天清明若日
橐弓戢矢陋秦漢之武功履革衣綈躬唐虞之儉德邊
人革面外服易心形氣叶和清寧並貺五穀熟而人民
育三光全而寒暑平米斗三錢端類四年之貞觀露囊
五日又當今歲之千秋無懷封山黃帝禪亭長見太平
之盛子晉吹笙安期奉棗莫量汗漫之期某等際運半

千去天尺五慚無妙語仰奉昌辰

雉尾差參寶扇開九霞雙闕聳蓬萊霜清法駕黃金殿
雲擁仙班紫玉盃天上剖符初繞電人間作頌已鳴雷
長生紀籙知多少瓠子澄清一萬回

王母

奉玉皇之寶篆有王者興飜佩女之雲旂來人間世雖
縹緲虛無之際皆涵濡覆冒之區遙瞻於穆之尊密獻
長生之訣恭惟來從仙闕下撫塵寰土圭測而陰陽和

宸極正而璿璣運農祥霽色景緯宣明天無風而海不
波星連珠而月合璧時也清霜戒曉愛日烘晴桃開十
月之花梅綻小春之蕊堯眉誕秀舜目開祥爰因閒暇
之時共享太平之福上奉重闈之壽下均四表之驩已
聞嵩嶽之如呼又見羨門之來謁臣妾胎身仙骨結屋
銀臺雖周穆王張宴於瑤池間從屈致而漢武帝塗香
於華殿竟未垂臨惟真主之應期寔上帝之有命故蓬
萊三十萬餘里不憚其遙而天皇一萬八千年願先以

告洊數鴻寶益行龜圖

青烏銜餌海邊來
報道羣仙浴佛回
玉侍雙成開翠箔
雲冠七勝下銀臺
萬年黎角丹方轉
千歲冰桃花欲開
更待丹成桃熟後
却來親奉紫宸杯

前筵勾曲

百世基圖光祚聖
神之主九天雨露恩
濃帝王之州上
奉台顏後部獻曲

醉蓬萊

望皇都清曉瑞日祥烟洞開閭闔一朵紅雲映重瞳日
月萬歲山高九霞杯暖正想宸游洽絕塞庭琛重闌天
笑年年仙闕韶鳳徘徊蒲魚演漾鎬酒恩濃龍蟠建
業玉琢麟符分付人中傑奠國安民持將祝壽樂作君
臣悅看取頭廳押班稱賀明年天節

後筵勾曲


天容不老千齡已祝於堯年地限無邊四海均聞於舜
樂至和一鼓萬象皆春上侑清歡後部獻曲

茶詞西江月

歲貢來從玉壘天恩拜賜金奩春風一朶紫雲鮮明月
輕浮盞面想見清都絳闕雍容多少神仙歸來滿袖
玉爐烟願侍年年天宴

湯詞鷓鴣天

飲罷天厨碧玉觴仙韶九奏少停章何人採得扶桑椹
搗就藍橋碧紺霜凡骨變驟清涼何須仙露與瓊漿
君恩珍重渾如許祝取天皇似玉皇



洺水集卷十六

欽定四庫全書

集部

洺水集卷

十七至
二十三

詳校官庶吉士

臣 翁樹培

主事

臣

呂雲棟覆勘

覆校官中書

臣

呂雲棟

校對官典簿

臣

劉景岳

謄錄監生

臣

陳賓

欽定四庫全書

泂水集卷十七

宋程秘撰

祝版

靈湖王廟禱晴

肅惟靈祠去縣里所某之來此亦既兩年而莫知有神
於此何異懷材抱藝之士宅深居隱而人莫知也夫四
月維夏女神鼓歌以司天和其風清明物生軫軫宜也
乃雨為霖上霧下潦穡夫桑女俟命須臾神其帥先百

職奮發威靈使蒙谷之日浴於咸池拂於扶桑午於昆
吾祥光赫曦彌滿天地間則豈惟斯民實所嘉賴而神
之威靈繇是暴白千萬斯年昭報無斁寧不甚偉某無
似愛人澤物之志每切卷卷敢再拜以私于神神其惠
顧

消蝗

螟螣蟲賊均謂之蝗得陽則生得陰則藏今白露既降
而濁暑未消鬱雲猶溽此蝗所為作也入夏以來賴神

降嘉先黍後種亦既堅好何物為孽忽生其間鋤喙如
鎌戕我垂成神其忍諸某無狀切自慕於魯恭之中牟
戴封之西華使蝗不入境而未能焉至於掃除洗濯秉
畀炎火豈田祖所能獨任哉惟明神降靈實終相之

祈晴

頃嘗請雨今復祈晴若無厭矣然握雨暘之權而司民
物之命惟神能之不祈哀於神而誰告矧惟今茲蠶方
入盎麥已覆隴神忍不加念而使前功頓虧乎惟神掃

除積陰澡沐新陽使祥光下炤而民物熙愉神之賜也
吏之望也

謝雨

乃月二日以雨請於神越五日亟垂嘉應物猶有不足
之意也七日之夕天地晦冥雷電皆至開決河漢澎湃
而下濡枯吹生澤流無垠敢忘神之大惠乎雖然一歲
之事今開端爾繼自今茲陰不僭陽不愆允謂時若以
訖有秋此神始終之賜邦民無厭之請也

祈雪

候應二陽瑞慳一白恭承帝命虔請佛慈伏願黑風翻
旂素電飄袂輕掣寶藏散作漫空之花普為洹沙催起
連雲之麥

諸廟祈雨

農之施功秋則望歲今既七月垂穎在田乃至旬時亢
陽不雨惟神監止將害垂成呼喻之間豐穰所繫願均
遠邇咸獲流通豈惟此邦獨受大賜俯陳懇惻仰冀照

臨

謁先聖

太極合德斯文六經邑祀為僭先儒著明不佩其訓胡
祀之歆庶與諸生退而服膺

兗國公

優入聖域具體而微脩食終古在寢當時仰止德容盍
克已私

鄒國公

斯文中興正統獨傳異代同心配此潔蠲盛服齋明浩
然充然

社

邑之有社實司此土東風仲月吉日維戊土膏方興匪
神孰祐

后土氏

昔平水土下澤上邱民奠厥居物生已稠於報何有潔
此明羞

稷

民為邦本食乃民天神實專之是用吉蠲相我穡事實
為豐年

后稷氏

教民稼穡蒸民乃粒豐功在人千載一日農田星明有
馨其苾

諸廟

神與吏皆天子命之以為民而分幽顯之責者凡吏之

所當為者不敢不勉至若水旱疾癘神之所以司諸隱者其惠嘉之

洪清之遷葬其祖尚書公中孚

某竊聞之庸庸者狎表表者折汙汙易全皓皓多缺由古而還悠然一轍秀拔黃石名塞青霄燕雲一疏萬古英標于何卷石寄挾山腰有美令孫出幽遷喬顧後植屏屹屹巨嶽萬馬千兵如從天落三驛盤旋乃鍾于麓前朝獬豸卓立步廊前後高低昂昂堂堂至是成象乃

若園光右列千筆左排萬戟他日偉人再見黃石歲在
丙申輒贊其決既窵一卮大峰三至汾酒臨豆如顧如
饗咸曰異哉十目所睹厥既越月如寐如見風骨嶢嶢
衣冠肅肅如慰如謝三揖乃退尤異也蓋公言言烈烈
千載不磨仰從列聖之在天嘿祐炎圖之千億更流後
昆同扶皇極有契如龜眡此銘勒

青詞

保安

十萬珠宮貌在紫清之上三千金簡流傳浩劫之間祇
按靈科仰干神造竊念臣一紆縣綬兩易歲符農扈豐
穰園扉清淨匪資眷佑曷降嘉休去春昭報之儀因仍
他故今歲潔蠲之薦又復愆期雖戴寬隆不勝怵迫輒
紆單款爰卜中元伏望貝闕雲輶玉京芝蓋少回仙馭
一顧熙壇潢汙行潦以自消蓋為民而請命霜雪雨露
無非教願與物以為春

乙亥天慶三省消蝗

涸澤三時已被發倉之雨羣飛萬翼尚虞傷稼之蝗方
仰答於洪私更俯祈於大造伏念臣等代天莫展畏帝
實深荷魚宿之澄光嘉生有潤願蛇星之歛彩孽類無
遺

鹽官禱海

天相民居奠於下土海鎮坤垓長于百神凡有阡危敢
忘哀籲伏念鹽官之境習罹潮汐之災闔縣千廬惴惴
為魚之慮良疇萬頃駸駸淹涵之虞臣食息熏心匍匐

請命仰神龍之有位暨水府之羣司監此微衷降之大
惠風濤受令寂無衝嚙之憂浦淑還沙永賴扞防之固
嗣新祠宇祇荅靈休

祈退

富貴世之甚欲或不存焉貧賤士之同差有甚於此人
所取舍天則從違伏念臣粗考古今頗知經理因自量
其才力知亡補於事功怵惕不皇俯伏以謂愿辭祿秩
幸衍年華此去一封儻遂乞身之請他年三徑敢忘稽

首之歸更期未殞之年益廣好生之念

沼水集卷十七

欽定四庫全書

洛水集卷十八

宋 程秘 撰

疏

汪復求東甲橋疏

地屬休寧溪名東甲合百源而同派歷萬折以朝宗遠
驅川蜀之車近走湖湘之騎旁連交廣密接江西凡赴
上京悉由此渡爭奈春霖夏潦拍岸浮堤坐賈行商姑
淹留於旅舍羽書駛足須皇遽以呼舡然而山東水湍

石高浪駭畧計比年之事覆舟者三坐令非命之人為
魚且百是故某等謹發願心輒傾中產之儲首倡千緡
之施顧工閔嶺取石萬安始役三年裒金半萬然而挿
空之石凡七礫甫就三洪覆橋之屋逾萬椽未營片瓦
初謂可干於闔境未嘗請疏於他州今既力疲勢難中
輟稽其終事必也萬緡不免亟走中都僭求一語然而
言輕瓦礫豈能易寶藏之珍或者心發菩提自欲填精
衛之海他日幾人行坦坦更教千載說洋洋

贈范甥可起

予之仲姊歸於高平有子曰震予字可起口不絕吟六藝之文手不停披百家之編汝子暨孫必壽其傳

祈雨疏

八蠶方眠雖惡溽潤九龍已起宜現神通仰絳闕之清嚴荅紫宸之懇惻伏願驅馳神駿吹動法蠡願於春夏之交時賜沾濡之澤十日風五日雨無復愆期小麥青大麥黃訖臻樂歲

治平寺消蝗

若昔如來曾於舍衛見一大火宅有百種惡蟲狐狸夜
千蚰蚘蠃蜒方聞晝啜盡成蓮花矧此螟蝗害我禾黍
言念佛父為世鑒王伏願發大慈悲現大威力凡屬法
界非法界一切驅除使有足蟲無足蟲悉皆消滅

治平寺祈雪

我聞菩薩昔在祇園頃刻莊嚴彌漫世界散雪圍之一
尺現寶花之萬重孰閔衆生是依諸佛下白雲之尊者

瞻皓采之如來展兜羅一色之綿開蒼蘊諸天之飯須
彌山上願睹毫光閻浮國中普資福利

寺觀祈晴

一雨過時雖民情之易怨微物失所亦天意之必矜不
勝迫切之私冀動高明之聽伏念三農之急莫如五月
之時蠶益方綠最惡溽潤麥畦欲刈尤便晴明乃罹淫
潦之灾立見前功之廢伏願捲豐隆之旆藏之西郊推
羲和之車出之東谷庶令動植咸被照臨

瑞慶節開啓

明堂配帝方承錫貺之敷皇壽齊天更冀珍符之昇先
虹流之一月衍虎拜之萬年恭願契道玉虛纂圖金籙
冰天華髮咸歌偃武之詩香案袞衣長睹豐年之瑞

功德

十月為陽月祥開五百載之期九皇首天皇坐閱萬八
千之歲請壽猶開於華俗祝休敢後於臣工恭願永作
民極丕承帝休雲起泰山長散九天之澤日升暘谷普

舒萬國之明

滿散

霜清猗殿新騰玉色之暉香靄梵宮共祝金剛之壽大
啓諸天之供普同率土之心恭願仁覆慈雲智光惠日
一塵不警落旄頭於昴畢之間萬歲為期明壽星於角
亢之次

洛水集卷十八

欽定四庫全書

洛水集卷十九

宋程秘撰

上梁文

雲溪上梁

封侯起第一日事苦未須忙栽花種竹十年成亦嫌太
晚已是半生行屋客豈應終欠蓋頭茅重憎羣蟻之銍
輒蠹百年之拱要須一洗聊與更新雲溪居士心住太
空身無定著今日展旗山下重葺先人之故廬向來垂

釣池邊又有子陵之素約天教留此則在此人謂宜遷則又遷不妨且同里社之雞豚也要時訊雲溪之水石金馬王堂竹籬茅舍顧其所寓如何好天良夜明月清風均在適意而已下不逮碧瓦浮烟之潤屋上不如綺窗籠霧之貴家柳種當門僅比淵明之宅草編成屋或同諸葛之廬然而堂上設叢庭前棣萼高有儲書之閣旁連燕客之區花藥分畦堂庭有序是亦足矣奚其華哉心匠既成梓人乃命時也農丁告隙霜女獻晴穀旦

于涓脩梁可舉聽我六偉作而一心

兒郎偉拋梁東
暘谷新栽百萬松
他日危簷交聳處
霜皮鐵甲盡蒼龍

兒郎偉拋梁西
石鼓崔嵬列岫低
下有老龍藏玉骨
千年凝竚度雲溪

兒郎偉拋梁南
金魚席帽紫霄間
堂名日對思親處
一段晴雲自往還

兒郎偉拋梁北
百萬琅玕森翠直
牆垣不隔護龍孫

長看傲雪凌霜色

兒郎偉拋梁上閭闔晴開天蕩蕩有手能修五鳳樓
應結雲梯高萬丈

兒郎偉拋梁下坦然心地平如畫不須築屋貯黃金
但要詩書長滿架

伏願上梁之後昆蟲無作燕雀賀成鶴髮慈親長見孫
枝之茂霜髯季父早膺子貴之榮不論公府茅簷共此
溪風山月更願無邊廣廈要令盡得安居

玉樞上梁

地據雄奇天開圖畫秀水匯麒麟之谷正宗派龍耳之
峯百里南來一川橫截碧潭浸石下遊巢葉之龜寶劍
騰空中有藏龍之洞左岫屯雲而行雨右溪搢笏以橫
金丙丁乃太微之垣日朝金殿乾亥實貪狼之水澤布
天關艮巽四維若城若障坤申二位如筆如旗五六石
獅在虎伏龍眠之左十餘魚袋列鼈遊鵷陳之前十里
巖高千春秀氣山君川后護此幾年女媧天皇至于今

日雲溪居士神交泉石夢遶烟霞得王屋山匱石之書
不專糟粕有劉累氏秦龍之術未露鱗牙乃因暇時一
至此地千古不傳於鈴訣一朝拔起於眠龍乃於戊辰
歲之秋營我先大夫之兆歲時易盡香燈尚寒載洎剛
辰肇建梵宇選勝青龍之首恭延白象之尊魚鼓一鳴
山川改色先君尉懌後裔光昌武列文班孝家忠國不
負前人之志勿忘今日之言百尺修梁一時盛事

兒郎偉拋梁東甲卯侵雲映日紅下有脩魚千萬數

他年一一盡成龍

兒郎偉拋梁西席帽旌旗列水犀更有雙峯如並筆
分明金榜列名齊

兒郎偉拋梁南天開壽宿丙寅間酉雞初唱催朝騎
曉奏離明澤暮覃

兒郎偉拋梁北馬上貴人如拱挹天然乾亥一川長
盡向丙丁朝玉闕

兒郎偉拋梁上此事端由天所相要須脩德荅天心

更教氣脉騰騰旺

兒郎偉拋梁下俯瞰平疇雲穰稔須憐火耨水耕人
佛法上乘先施捨

伏願上梁之後僧徒清淨佛法光輝風調雨順家給人
足要得萬民之安業永令四海之無虞我當竹杖芒鞋
共此松風菊露庶與天下佛子於今永結良因須教黃
面祖師為我全開正眼

萬卷堂上梁文

伏以四十年遊宦顧須自安石屋之居三萬軸崢嶸猶
未有挿牙籤之地况可飽衆腹於今年之歉而又拜天
賜於一日之閑積雨逾旬新晴一旦工其舉矣僉曰時
哉聊述散懷姑留野詠

兒郎偉拋梁東挺挺南來太華峰正類當中提一筆
垂紳正笏自雍容

兒郎偉拋梁西誰遣三山拱護齊正枕中屏旁兩翼
天儲秀氣瑞雲溪

兒郎偉拋梁南南有三峯碧漢叅不用撥沙尋妙訣
分明象合鼎魁三

兒郎偉拋梁北列嶂巍我如立壁中有天門一最高
全似天街馳玉勒

伏願上梁之後蟬不入簡芸常生香上觀羲昊之皇風
下掃漢唐之陋迹要令有補於當世庶幾不負於儲書
勸農文

壬申富陽勸農

仲春勸農非文具也令到官五閱月此邦農事大畧可
見地狹而人稠土瘠而收薄通縣計之僅支半歲半歲
所食悉仰客販今日受詞訴每見其指墮農之人則曰
冬田不耕一枝之桑亦必爭護則此邦之農不待勸矣
然令尚有所見請以二說示爾農焉其一曰勸農其二
曰無妨農令嘗至郊外雖曰田無不耕而糞田不至每
見衢婺之人收蓄糞壤家家山積市井之間掃拾無遺
故土膏肥美稻根耐旱米粒精壯此邦之人重於糞桑

輕於墮田況是土色帶沙糞又不至則米不精綻根不耐旱此糞田尚當致力也此邦平地固盛植桑然江東江西之人凡低山平原亦皆種植嘗見太平州老農云彼間之種桑者每人一日只栽十株務要鋤掘深濶則桑根易行三年之後即可採摘蓋桑根柔弱不能入堅鋤掘不濶則拳曲不舒雖種之十年亦可搖拔此種桑之法也低山平壠更當添種則蠶絲之利博矣此令所以勸農者一也周禮大司徒以保息六養萬民既曰恤

貧又曰安富大抵富人資貧人以為財貧人恃富人以為命貧富有相資之理不可偏廢且如近日因舊會通行已沒之質已賣斷之田紛紛贖以千萬計令未見虛實姑為施行所當退贖者富人固不可辭所不當取者貧人亦宜自反有錢而贖者固舊物之思復其間無錢轉假於人者往往皆是或取之於東家復賣之於西舍所得不多奚苦結怨縱使贖得未必能守鄰里親戚顏面奚施若是借錢不如就業或加典或斷賣得田之人

亦勿靳吝比之平時多捐薄少與之且免爭辨復免贖
去今來寄庫之錢既已在官爭辨未定舊會限迫約束
分明未得為業無致過時徒費爭執大抵貧富貴賤死
生壽夭莫不有命命所賦受毫髮難逃貧人當知分定
節食省衣盡力耕桑辛勤商販無萌負債之心常思富
人濟我急用勿萌偷竊他物之念常思官法壞我肌體
富人則又自思曰天之生財為衆人用今吾乃獨多得
焉其可不知聚散之理乎消息盈虛天地陰陽所不能

免富貴其可恃哉無過取其利息無侵奪其疆界無包
占其畝步無陵轢其愚弱契券必分明無攔典無攔賣
無浮租雖是鄉俗必竟戾法洪範九疇其一曰五福五
福之中富居其次好德又居其次富而不好德則不能
保其富矣所謂德者非以物與人也亦非姑息愛人也
德者皇極也皇者大也極者中也大則器度不狹中則
好惡不偏不狹不偏則存心近厚皆是有德天必報應
世固有多行不義剝人利已而亦致富貴者此皆氣數

偶差而非天道之常故不能久或一世或不終其身甚
者不能數年有因奇禍而赤族者傾家者令嘗多見之
蓋愈富者所為不義愈多故得禍愈酷又嘗見積德之
家其後必生才子產後人取儒科登顯仕有為宰相者
此無他皆天以其所施於人者而報之也蓋人雖貧窮
皆天赤子人而戕賊困苦天之赤子豈不為天之所惡
哉富者能處其富貧者能安其貧則禮義興風俗厚更
能輸租以時無事追呼差役既平不須爭糾篤親族之

義無恃長而凌幼叙鄉井之好無因財而害誼小辱必忍小怨勿念無辜殺耕牛無輕生詞訟無鬪毆犯法無唆使人爭訟古人云教唆之報殃及子孫不惟富者可教子而貧者亦可以讀書如此則爭訟日息田里之人不至官府則可以無妨農矣既能勤農又無妨農則家安得不給人安得不足哉令生長田野每事不為虛偽凡所以告爾農者無非樸實可行之說爾農其歸告爾子弟爾鄰里其相與共行之令不勝狼狼焉

洛水集卷十九

欽定四庫全書

洛水集卷二十

宋 程秘 撰

賦

壬申歲南郊大禮慶成賦

皇帝御寓十有九載與今為再見于上帝惟王者父天
母地尊祖配天顧已疏於三歲矧克修於十年我藝祖
之膺圖秉籙也道冒六合功該八埏儒臣夙咨合饗載
嚴破前王之陋揭來世之先前期裸鬯至日潔蠲於穆

太宗重華比隆歲元叶吉二祖並崇列聖揚休是則是
共感生配祀火正奉祠興國顯太一之祐咸平昭五帝
之宜燿燿皇文森羅帝儀炎祚中興熙事孔明偉上聖
之繼照顯睿德之升聞中更孽臣胡然弄兵攬搶搖空
戈鋌滿地宮而不郊禮廢以墜倬彼元臣運膺泰亨天
子善任英明不疑和氣充塞扑蹈布野年穀豐衍災沴
消伏日月燭乎幽衢雷雨灑乎寃菑爾元老兮以蒲為
輪爾雋髦兮復招以旌拔偏裨兮人自期於衛霍之列

秉圭符兮家不遜於龔黃之名日月功兮課中才之士
拘攣脫兮待非常之英鬱然龍翔油然霧蒸用能包藏
之姦天發其橐干紀之夫神趣其縛豈曰無幣兮今泉
流豈曰無粟兮今紅稠稱鈞衡兮物不頗解琴瑟兮聲
惟和天子曰嘻爾相之力元臣拜手我后之德天子不
居薦之上帝乃稽玉厯乃練上日歲紀之申日至之辰
先成乎民乃及乎神奉牲以進博大以碩奉粢以登有
芬其苾祝無媿辭天其饗必時也絳闕天低宮壺漏遲

六龍雷動千官影隨原廟先謁圓丘載祇奠奉雲陽之
璧瑞陳宗伯之珪露凝冰簋雲飛寶彝虞夏蕨罍酒
象醴肅肅乎觚壇之靜洋洋乎英莖之遺龍章兮袞輝
玉采兮旒垂天容兮雍愉天步兮委蛇臣工巍峩環珮
參差玉鱗金猊燔燎烟霏神光若交對越靡違永言配
命流慶丕基禮成樂諧人神以熙宗卿奏畢殿監授衣
已乃輅車樊纓龍旗日昇清蹕警蹕周廬撤星登龍翳
芝蛟蟠螭騰鸞駉豹尾黃鉞金鉦月卿按節九軌塵清

乃御端門乃宣巽澤陰山瀚海杳無垠域頌聲滂洋流
祉融液此人之和也六花先紛前星澄彩寒氣霽嚴晴
光散靄數點灑空適當肆沛此天之和也天人並和厯
數無疆天子萬壽元臣作朋靈監觀下方外慰寧答天
闕休宣烈斯人益彊不怠吾相吾君丕休哉唐虞鳴和
明良載歌惟唐有臣亦賦南郊矧伊我朝文學成林鋪
烈揚芬寧遜昔人望雲章之玉冊想翠鸞之芳塵是用
作歌憲世千億宣之樂章刻之金石

仙露溢金盤賦壽皇子

日躔角宿昏牛旦觜適與月妃合於壽星此仲秋之候也商精之君曰少皞金官之臣為蓐收此素帝之所以次於炎皇者也銀榜輝輝銅樓隱隱前星帝子之宮太嶽天孫之宅畫堂甲觀拂丹桂以飄香長坂猗蘭散清香而結佩是以若木分暉天津澄浪太師吹銅而御戶左太宰持斗而當戶右光浮仙露於金盤日映彤雲於寶帳坤合太和天噓一笑得非今日之令辰而皇家之

大慶歟至若躬蘇融之忠孝飫王褒之禮詩寬仁秉德
未訖前芳聰哲照人有光往牒千官熙愉四海依瞻若
夫落雨銀鈎東阿擅筆搖山玉彩龍翔飛章又皆其抑
末者耳丕休哉眎膳五朝問安三至餐道沐德崇師禮
傳侍舍元之萬年閱金蟬之千歲猥以寒姿寘之末綴
父天母地幸逢震一索之祥日光月輪請獻樂四章之
義

金華仙伯賦壽喬平章

八月九日之交沆宕氣清天宇澄穆於是紫陽宣平駕輕風衝薄霧下子陵之瀨入桐君之廬膝行稽首順下風而請於金華仙伯曰恭惟仙伯真坡仙所謂絳闕雲臺總有名應須極貴又長生者也仙伯曰何哉宣平曰十年以來有大勲勞於王室四方以寧六氣以平建平章之隆名冠輔弼之儀刑得非超然獨出於雲臺之上者乎駸駸期頤帝又錫齡還童神爽躡雲步輕肩可拍於洪崖袂可接於廣成又非隱然翺翔於絳闕之間者

乎仙伯輟然而笑曰子亦有聞乎宣平於是仰而栗俯而慚乃再拜又前曰區區蒙昧居歛之陽餐霞飲泉兀兀窮荒至德要道莫睹端芒恭聞仙伯起石為羊祈少賜於刀圭或可脫乎塵滓之場

秋水賦壽李尚書

森兩間之物萬惟五物之莫京上騰乾端五緯粲呈俯列坤維五方奠名金石播諸五聲順成黼黻昭其五色有瑩贊元功參至化利用群萌於是則為五行考混沌

之未鑿惟二氣之堅凝有氣則有水故曰天一所生則知水者是為五行之啓征也震下坤上其卦為復日離南斗泉發幽谷體生於冬用見春夏正養於秋至神不化瞻彼銀潢澹乎午夜相彼允金接乎夏假則知秋者又為水之靈舍也繫人之生五行肖形英英我公得水之精由西江入彭蠡徑湓浦背震澤又折而東茫洋潏潏與沱潛河漢爭先後校疾徐已乃搏扶桑浴方壺渾天形以中涵噓雲氣而直上夕月同光太陰合象與海

為一莫知其狀此蓋公之德業無涯而勛名鼎盛者也
鍾河漢之清以為氣貯滄溟之浸以為量斟酌不息之體
以為德賦無方之形以為智慮回瀾之勢以為文灑不
澤之潤以為仁則得一而正至精而神安得不與此水
也後天而不老先天而固存哉雖然人固非魚魚亦忘
水縮之一勺不見其膠杯散之八紘不見其滿溪河伯
不慊於無餘海若無夸於多美獨不見潮乎澎湃沸渭
蟠吳捲越汐平液息萬里一色變化翕忽誰窺以臆四

海既澤歛而東湖初九潛陽乃坎之精此則公頃年對使者之辭而潁濱亦謂四大海水同一濕性者也厥有人焉分井之泉兌金資養離日為明不為任公子而釣于東海之濱目不存乎鰕鰕鱠有取於鮓鯨公其賜之若木露英庶幾汎渤澥而浮滄溟以問乎河漢之津

四明洞天賦代壽何中丞

八月之秋璿穹浸高幕府晝長文書亦靜聊假寐以憑几湛午日之在空習習乎如醉露英飄飄乎如乘赤螭

而御剛風歷十洲過三島海王戒嚴雍觀不怒舒徐般
薄於二千七百里之遠遂至於三神山之上於是排雲
障叩丹門前方壺後赤城貝闕龍蜚玉除虎蹲燦赤崖
之木石紛瑞壑之瑤琨飲東方之清氣視太陰之吐吞
仙官佩環威容甚溫安期降謁偓佺導前問公安訊官
今孰尊起經綸於一念去清都於許年布武蓬山寥裳
諫垣下瑤池之旌節鎮四明之洞天曾未及對忽有顧
僊左持朱果右酌金觥鼓瑟鳴球鸞鳳飛旋白羽一揮

王虬蜿蜒子其歸乎為吾一言風雲千歲上帝隕祉入
綿邨鄔之圖外刷幽燕之耻然後封泰山禪梁父舉萬
年之玉卮相太平之君子還如傾年領袖仙官集真人
於斗柄朝北帝於天關言于于而未畢夢蕭蕭而亦起
夕陽挂山明星浴水望靈瑣以茫然庶憑辭而致喜

釣臺賦

予與客泝富春之流入新定之區舍舟即山將遊乎嚴
子陵之釣臺客曰詩詠考槃易嘉肥遯洗耳波長嚼薇

味在或荷簣而歌或濯纓以喟或彈北窻琴或負南疇
耒或逃去無名或歸來適意或託以酒狂或隱以詩真
或膏肓泉石或生死絲綸今昔之士何啻千百輩卒與
微塵斷梗以俱湮而予陵標榜獨到于今耶且吾與子
幼而學壯且行之葦野礚溪翻然來思而又烏取乎隱
者之所為乎予笑不答客亦不言遂相與攀蘿側足登
乎釣臺之巔拂薜磴以危坐訪幽蹟以遐觀壁立巍峩
之石下接魚龍之淵險萬折而忽平逼象緯於曾闕其

旁則重巒複嶂氣象紆環雲魂霧魄棲合其間鳥啼晝
靜泉落涓涓古藤曲蔓陰森夏寒怪木千章夭矯龍蟠
幽壑噓風空江浴蟾其下則萬頃寒濤回伏奔翔擾擾
曾波三軍騰裝川君怒靜素練拖江日薄沙晚風帆浪
檣一徑接溪草綠汀長維時秋也快清風之颯至喜晴
天之開碧瞰危崖而笑語起老蛟於淵螭頓足望乎八
荒使人飄飄然而氣逸於是解觚酌酒晉酹于先生曰
嘆哀平之不吊兮人人鬻漢以求官與天子有廬江之

素兮乃老百年於釣竿山林鼎食各有意兮未易論古
人於形骸之間既而與客醉卧于石舟人驚報潮來船
發

洛水集卷二十

欽定四庫全書

洛水集卷二十一

宋程秘撰

擬古詩

壽皇子 弧南有星

弧南有星應期也他非無時必於秋見焉其星有六一
曰老人磊魁晶熒歲有常期見於秋分秋分維何天高
氣清玉蟾吐輝銀漢無聲澄霄一色萬里雲平此時候
之出丙入丁所出之國政化和平人生其時既壽且寧

矧復前星以及子星與之並明天啟休期應期挺生

神龜負圖

神龜負圖萬世先也道原有始道統無終要其統以邈其原也太初孰元渾淪蒙密瀰漫宇宙一氣沕濶孰知是時無極有極天高地下人生物出疇雖未分易雖未畫行乎其間充滿周悉炎黃啟序姬孔扶機陶為泰和數千其期寓為六經萬言具垂太史變法漢唐續維迄于我宋皇皇巍巍百代以下上接農羲畏天若臨眎民

如傷消斥姦佞登崇雋良急將寬兵我武維揚選牧與
部仁風以翔節用裕下根深本強身修國治綱舉目張
由經而史自皇而王以暨我朝同此一綱天賦高妙學
力深詳上而河洛之圖畫近而我祖之憲章貫千古於
旦暮歛一心於混茫大哉斯學夫豈經生學士析解章
句而已哉

鄭沆瀣

鄭沆瀣葆天和也皇穹發靈炎圖中興南呂調儀運叶

千齡金相玉質虎步龍行親師問道日進月新以是事
親忠孝一忱以是格天昭徹一心人之忠佞事之幾萌
至則能斷舉無遁情夫是以清明在躬志氣如神綿綿
若存為天地根非道之外他有長生又況秋飲沆瀣宵
見南極風雲叶和海邦寧謐楓宸椒禁兩宮怡愉忠厚
所根仁浹閭閻願壽多男洋洋康衢天賜玉卮人歌紫
芝磐石蘿圖維熊夢奇孔蔓且碩時萬時億

洛水集卷二十一

欽定四庫全書

洛水集卷二十二

宋程秘撰

五言古

三月十八鎖試童子侍其行卷蕭然無事成二十
韻謾呈同省

旬雨埋青冥今晨浴新陽老紅墮萬劫稚綠籬千行葉

碎青槐古條淨紫薇香去歲護簷簷今年已蒼簷

右史窓前

竹萌余去年護之甚至今皆蒼竹矣
翩翩翻鵲引雛伊優雀繞牆有象咸熙

愉對時多慨慷門外車馬喧省中日月長要之非大快

大快在滄浪滄浪興何窮風帆十丈檣明日酌嚴君嚴自

入浮邱蔚南翔

浮邱飛升於嶽之黃山

快馬秣青山恍入萬松莊

先

山中多老人雪巔更眉龐持酒相勞苦兒童紛迎將

小卧聽雪塢

以下皆山中景物

徐步堆雲鄉玉界梅萬本烟海

杉千章三峽桃源浪九夏水巖霜危橋跨長虹曲水飛

輕觴兩日足可周百年事難量送客出松關壯健設門

旁揮手謝世人從今永相忘

勉子姪

外物不足恃翻覆百年間唯有黃卷書可以鮮我顏男
兒貴立志達人得大觀百川日夜流與海會波瀾邱陵
安於卑寧復望太山方當少年時髮齒未凋殘聖賢戶
庭闊人人可躋攀謹勿隨餘子碌碌走邱樊

揭富陽孝子門

去年何明正有女方笄年母病偕幼弟奉佛祈病蠲既
蠲未全已剖肝代蘭荃今年盛立旺二子亦奇偉兄肝

起母病弟復先割股人生貴男兒愧此簪笄女裁裁儒
冠弁愧此田家子子謬為令長冥愚化不宣彼直天性
厚或以上澤覃勞之緡酒廩重為此詩篇揭之旌其門
觀風盛采旃旣以勸邦人庶幾風普天

送夏明叔歸建寧

頃與君別時君頗未生髭習習二十年驚見紫髯奇相
逢不相識跡刺乃得之尊酒出文卷芙蓉陰未移白露
團虛簷素蟾墮寒池胡為於此時與君又語離自言甘

旨急毋失舊館期丈夫屬有志富貴無定姿願君勉自
力上以慰親思明年寒鴈來殷勤寄書詞為報秋風高
吳仙得桂枝

送常世卿歸嘉興

悔作唐山來山深交友絕相逢忽相得乍見又乍別嗟
此冰玉人寒梅疎帶雪曾次羅文奎筆底耀離纈朝家
渴英雋結網仍高設行且收殊科勉哉嗣先烈一編忠
義傳姦萌嘆先折千載懦夫魂脆骨變奇節識此吳中

奇復幸拜前哲何異魯國人一朝獲雙珎晴雲起芝田
東風催啼鵲慈庭有近書明朝動歸轍新抽草可茵微
露花堪折相思復相思後夜天邊月

讀史有感

俗士貪芻豢喜充黎莧腸幽人樂清曠要湔塵土裳嗟
予別松林吳砧九換霜困復不知歸念之汗如漿

仲冬望日登四顧坡

往哲有清言晉人未為達此身皆假合既散安用錘大

音不在絃琴亦安所設當時逃酒徒往往畏侵及豁哉
桴海時風濤任興息

哭吳范二姊

嘉定庚辰持節吳中冬孟三日得仲氏書以伯姊訃來數語寓哀末有東

山十載相從之句庚寅七月十日閱故書見之
六月四日仲姊一疾不起因思庚辰至庚寅恰
十年非識乎
投泪識之

逝者如斯乎翩翩北飛鴻鴻北來歲南人去亡回蹤庚
寅仲姊去庚辰伯姊空千里不一見血淚迸秋風自餘
只一弟留守先人宮我已日崦嵫安能久轉蓬束擔其

歸與相從十載山之東

輓朱侍郎

卜宅從先壟駕言練日良飛蓋驚玄駟古柳被龍荒按
轡且徐驅聽歌薤露章憶昔朱峰仙浩劫思陶唐貂蟬
換羽衣翩然來帝旁西車極岷峩南佩窺瀟湘高牙開
桂林瑞節照襄陽多少經綸業春風散八荒歸來不言
功低簪鵷鷺行一朝侍甘泉天渥方對敷堂堂山立姿
九尺鬢眉蒼胡為勇不留瑤宮去路長夫人有令德威

鳳趣歸凰輪摩同入道未忍遽相忘春天渺無際春花
堪斷腸祇今楓林崗雙玉一時藏西南多甘棠日暮人
淒涼風月三千篇爛爛先生香佳郎與快壻門戶未渠
央三者無一憾嗚呼公不亡

輓致政呂通議

營築未休車曉夕留松區忽聆載輶車歸自杭與湖冷
雨澁不晴山徑淖如塗間關五百灘轉軸上雲衢純孝
恪玄穹安席若平鋪憶昔祖慈親六月暑方徂奠酒雖

百壺練溪焦金枯今日遡長風辛岨諒一如維公有賢
稱藹然溢粉閭千金手不售其鍾後人乎天畀此石窮
指顧即吾廬且復憇以平萬家守者居甚欲一引紱山
寒阻前趨黃羅金紫峰送目但躊躇

洛水集卷二十二

欽定四庫全書

洺水集卷二十三

宋程秘撰

七言古

高宗皇帝寶訓終編錫賚進詩

紅雲一朵金爐煙黃傘亭亭午漏傳龍床猶御金華殿
方進羣儒讀寶編編中並載神堯語三十六年真復古
祇今安用讀遺書卓然已復光前緒高皇當日濟艱難
猶在經綸未備間今日山東河北地百年侵去一朝還

更有祖宗傳國璽琢於元祐隆平際王光射日篆雲飛
今日煌煌登寶几高皇一笑在天靈神孫今日再中興
賜與千秋萬歲齡甲兵洗盡年豐登羣臣尚或呻佔畢
微臣但拱坳頭立芳筵華秩及龍媒亦拜聯翩自天錫
更憶先朝徹講餘有臣曰軾感恩腴願對紫薇花影下
試草招來贊普書今也梯航慕中夏無復更待招來者
微臣但摩千丈松敬賡吉甫中興雅

秘閣儒榮堂

天狼騰騰照單于怒麇抗獄于上都松漠城高沙萬里
其下所牧驂騮駒皇仁配天覆中寓西垂北際杳無區
七十年來軍事絕謀臣猛將皆邱墟兜鍪摧剝土氣蝕
塞馬不鳴秋草枯祁連山下安穩卧歲將金帛自膏腴
文儒申申武士墮先生奮臂一長吁當時顛末誰能記
家有中原孤臣書吮血為墨膚為紙驚風吹到玉蜚除
誠通精寤動乙覽天經地緯開廟謨手援神矛截河漢
中天真人正握符蛇龍螭虎雜萬騎庸蜀荆楚從吳車

皇旅如雷鉄嶂碎汴水沄沄汴風嘘尺檄夜傳三秦定
侵田歸魯在須臾向來孽霧漲北極羲和一旦晴光舒
頓紘提綱無虧闕澶漫萬里宣皇圖怖威報德永無畔
施令酬功偏裨俱上下兩間皆叶序天錫皇壽天齊驅
炎精亦曜暢大鈞天祐皇業卑唐虞金石並奏告清廟
圓壇紫氣霽堪輿丹門宣赦傳天下百萬頌聲流康衢
此時此書方策勲先生憂國榮有餘

代上楊誠齋

杜陵已醉老坡仙生後百年恨不及那知開眼大江西
突兀見公正冠幘凜然清風不可攀千載懦夫毛骨栗
暇時畧吐胸中雲坐使九霄成五色未辨執樂三千指
不計酒材七百石落然收寶入丹田歸省廬阜千尋碧
那知城裡住相如但信城東有太白一時餘子皆鷗退
家有諸郎傳正脈世塵千劫都磨盡獨有詩緣渺亡極
天欲留公在世間管領風月長為客彩鳳一鳴天地靜
安得微吟容晚出詎止青山吞澤芥許投頑石博拱壁

先邱宰木已參天
幽碣未刊但惕夕
魯山四絕先李文
誼貫幽明光存歿
先生匹素不可辜
儻得烟雲生勃鬱
化為匹錦授邱遲
磨鈍為鋤希萬一
要是人貪常熟書
非關買菜復求益
詎敢限字如昔聞
小大當唯意所適
庶幾挂在露寒堂
琅然一讀意一釋
不須點白鱸松鱸
解衣卧聽歌赤壁

辛亥冬交石阻風三日

陰崖老虎殺氣驕
一噫三日攪沈寥
日寒不焰雲飛逃

乾坤蟻轉東南高疾勢已作奔天濤餘威猶捲少陵茅
魚鼈怖死蛟龍號舟中性命如鴻毛起來危立大江臯
白沙黃塵紛驛騷徐呼風伯入苹蒿拍撫八極建六鼇
翕張橐籥吾誰曹太平之風不鳴條

登紫微崖

富池大信江千里三日醉卧烟蓬底曉來推蓬登斷岸
因憶牧之呼屐齒九華隆隆闌天脊微雲低度差參是
百喚牧之如不聞剝脫塵痕見文字今年十月天未霜

木葉留露光嶷嶷興亡風流不可論蒼松怪石還如此
我今與子陟層巔酌酒賦詩云樂只後來誰復是牧之
斜陽歸路芙蓉水

於潛佳丞四明人同年友也方此掉鞅百未一見
而來書羅縷無非歸與語豈醉夢書邪三詩見寄
亟占數語正之

世人眼見真蓮少真蓮却在玻璃沼浣花溪水入銀河
何人更識月皎皎謫仙不見見梅粧荷稠蹇作芙蓉裳

黃龍乾葉何年墮維摩雨花昨夜芳真花真詩元在眼
要須心地先清涼不然瀟湘水清寒磯月沙平水晚露
低昂勸君休問張子房鑑湖十里藕華香天駟超河夜
未央胡為自同太白光何時握手論行藏江東雲暮天
何方

太上虛皇黃庭經句法十篇壽趙帥

今存其七

太史告春纔五日東風昨夜傳消息斗邊一星下南極
飭以貂蟬扶社稷更昌斯文開民則

其二

去年曾說冬菹綠今年蓼甲春盤簇綵花金勝相輝屬
五色斑衣佩蒼玉先奉庭幃千歲祝

其三

莫辭金醖十分斟邇日星郎寵數深庭前桂子更鮮新
鰲頭早晚貼塗金公亦綠殿栽華簪

其四

漢列土宇封同姓唐擢宗英持國柄我宋膺圖臨海鏡

參天杞梓仙源盛
蕭敷艾榮何足訂

其五

向也何幸識仙翁
玉粟春明盛德容
又常一再見阿戎
神情穎異機生鋒
公家流慶無終窮

其六

明年天使九街馳
御茗名薰宣玉詞
更敕儀鸞餉壽卮
我有新曲名紫芝
會當獻之鳳凰池

其七

喬松落澗節輪囷詩書萬卷終經綸日華隔霧光難晨
公獨知其墮凡塵何當一為問大鈞

郊臺信筆

江天欲雪未成雪堆出雲頭照霜月此夕更長不可辜
何時百萬入彩盧幾年長涎一車麴輸他獵奴飫生肉
也須龍伯坐鼇頭却看沙磧卧鰕鰕

玉堂晝值有懷萬松

雞籠峯下萬松山中有游民天地閑左架虹腰上玄圃

右騎鰲背度飛關幽壑流泉噴三峽袞袞桃花翻浪雪
兩山對峙錦屏開嫣紫肥紅仍炫白十里松風百嘒琴
丹書一枕卧殘春何人共結無生社冉冉青蜺下玉麟
九華突兀匡廬禿幽深全似入盤谷懷山一夜鬢如霜
畫作烟圖入洛陽玉境那容凡骨誇急草天章訊歸路
磨松琢石歌太平亦表微臣報國恩

汲井溉田民亦勞止歌以相之

短綆長鉞高下飛老農雨汗紅淋漓夜來雨意已垂垂

一事不成風又吹決破王龍太清池滿浸萬頃碧琉璃
贈毒菴

高座不知甚面目當時喚作尸利密要須勿負此標題
更向托茶山頂立

伐千秋巨木竟梁梅堂

二木盤根三千秋萬斧過之無敢眎今晨有梓號國工
朋曹十數來睥睨為言此木難斧斤上有蟠龍下伏虎
莫教驚動萬年枝掣電轟雷三日雨直須作法起南風

號召百神同力扈昂昂頭角向梅堂五六鎮星來作輔
坐令國勢鞏蘿圖萬歲千秋奉明主

奉送季清赴山東幕府

黃雲銜雪天模糊有客飄然出上都青絲絡馬銀兜鍪
紅錦韉弓金僕姑劍光壓匣照路隅帕首百騎前訶呼
不知客本山澤曜今胡為者意氣麓自言有將新孫吳
我欲與之同長驅嗚呼破敵豈難且病兵怯將自逃逋
胡不觀昔我藝祖造中區以兵為國垂洪模河北河東

義勇徒二十四萬鼓應枹中興益振尺五符世忠淮左
聚熊羆劉錡淮西貔虎俱上流岳飛彎天弧金陵張浚
羆搏狐手勅不賜弓矢旅長城偶倚雍公虞邇來聞敵
尚窺窬門內羣寇更睢盱胡乃腴剝及其膚豈止牛羊
不求芻我欲別幕飛於菟十萬一屯淮之區技閑器利
整平居幟明鼓震菟彼廬精神所折敵如無而況山東
羣盜乎五符儻缺聽其虛十年且盡一賦租斬然折畫
勿牽渠他時混一更新圖偉哉玉帳得通儒君復碧油

吐良謨凌烟豈一貂蟬與

新舊句

憶昔丙辰還親旁恰恰先春社三日社日侍親行交源
紫巖兒拳森玉立是日天明風氣柔入自交源茗源出
迤邐又復至前山涉澗還家日將沒慈親意在營一邱
卷卷欲於近舍求當時議論悉未定那知今作汪潭遊
汪潭去家正五里百里來龍於此止

至此七韻不記甚
年作壬辰秋孟中

沐日足
下一段


龍止水亦止清潭窈無底寶劍秋橫空秀峯春

笋峙最愛了角羊艮木之印鄉長生亥水來朝丙千古
長溪流不盡雍容冠佩紫薇垣壽星更出丙丁間神遊
既安後昆福賦此銘章皆實錄

子時歌

順數方來兮邈而上之洪荒今不必短兮古不必長地
有時而玄兮天有時而黃知靡草之先秋兮又當知喬
松之傲霜知滄溟之連山兮又當知太華之有長江朝
云西暮云東兮豈期悉避乎陽光入濛汜浴虞淵兮又

孰知其扶桑吾烏乎而折衷兮但當付萬化於茫茫



洛水集卷二十三

欽定四庫全書

集部

泐水集卷

二十四至
三十

詳校官庶吉士臣翁樹培

主事臣呂雲棟覆勘

覆校官中書臣呂雲棟

校對官典簿臣劉景岳

謄錄監生臣胡俊

欽定四庫全書

泂水集卷二十四

宋程秘撰

五言律

郊祀慶成詩

有序

臣仰惟皇帝陛下躬上哲之性遵列聖之謨穆卜新
陽昉嚴大報天地合饗祖宗並崇晴光映於祥光冬
夜溫於春夜燭花如綴蕭烟不搖頌聲流乎天衢英
風薄乎榆塞臣待罪翰墨幸列侍祠懿鑠鴻休得所

親睹謹撰慶成詩五首一章述大典也二章玉輅如
青城也三章升圓邱也四章禮成也五章言天眷聖
德並隆不已也干冒天威俯伏惶懼

粹古皆頻歲炎劉或異祠有唐方定制我宋遂因儀列
聖馨明德皇宮答顯祺恭惟聖天子大典應昌期

其二

涓潔先原廟純忱歷太宮八神開列闕萬騎擁豐隆軌
道清風肅洪頤麗日紅康衢聽細語八彩更重瞳

其三

牙籤猶未進玉冕已先須峻級飛平步端圭卻掖扶祥
光匝霄極和氣涵天區福飲煙升已儼神靄瑞符

其四

紫時祇堂陞蒼龍奉駕回邊塵知電掃歲稔十年開丹
鳳覃天澤東朝奉玉杯樓前呼萬歲砰隱動春雷

其五

謂聖惟能饗由心克致虔天心今答聖聖意更祈天沖

性猶勤德搜求愈任賢愚臣輸至愾端在賦甘泉

憲聖慈烈皇后輓詩 二首

西汧俱來日東朝極盛時彫弓平黑海彩筆照丹墀
起先裁費丹成不用鑿人間空悵望風月宴瑤池

其二

聖祖艱難業重孫擁佑恩玉妃閑寶簡仙御送金根
杳龍先去翩翩鳳又翻塗山望堯穴日月萬春存

光宗皇帝輓詩

厭聽人間樂催成海上丹雲車分白象天仗下紅鸞梧
野朝烟淡咸陽暮日寒龍舟宵濟處清血漲江干

光宗皇后輓詩

玉鎖辭椒禁瑤宮問廣寒人間方祝嘏天上忽飛鸞弱
水三山隔華胥一夢殘聖情凝望處仙御景雲端

寧宗皇帝輓詩

聖德同天運神功並日昇邊庭懷慄慄齊魯格烝烝復
古周圖盛中宗漢業升未饒元結輩磨筆誦中興

丁亥閏五月十日回自真聖道坊車中記事書

列障羅屏合回泉玉帶環外容三肘密中着十洲寬天
意驅蹲虎人心見聖蟾煩君招舊隱來此共潺湲

書富陽普照院二首

境勝由盤古聞名自謫仙一從江國後又到老坡年山
頂煙仍紫樓頭月故圓繼今知幾劫風物更依然

其二

祇愛招提古那知俗更醇寺雖炎漢代人尚葛天民僧

定都忘客林深自鎖春我來千載後更有後題人

紅藥當堦翻

校官試

禁近煙光潤堦平日影暄黃麻方草罷紅藥正花翻
舊色浮春動清陰匝午繁心傾青瑣客香滿紫微垣
漏永文書靜天低雨露溫人言有仙骨早晚拜明恩

夜登釣石

頗憶嚴君瀨還尋釣石緣鄰雞方叫月邊雁恰書天
白秀來仙白聲和應樂全展編真一快如放五湖船

輓程給事

戀闕葵心在懷山秀野寒華繁常侍媿草隸折衝難結
綠紅輝碎懸藜夜色殘平生桑梓地雪涕景雲端

輓汪給事

抱大難傾橐隨時欲見田星災諸葛日齒少紫芝年魯
國麟枯骨藍田玉折瑄忍聞環珮響帝所侍鈞天

輓汪端明

諸老都淪謝惟公尚典刑謀謨關社稷風采聳朝廷政

路方虛席台纏遽折星幸哉芳史在寧用問丹青

輓吳郎中

志抗金堅厲材成玉粹溫時哉非不過命也更奚言季
子風流遠吳公治行存敬亭無恙否愁絕暮雲昏

輓程樞密二首

厚德推吾黨脩名藹列紳明經魁別幙仗節聘殊鄰南
嶠思良牧西樞失重臣龍原高冢在千古卧麒麟

其二

忠壯源尤遠新安盛莫偕千年瑤斗柄一夜玉樓階學
業光文簡儀刑謝良齋曉鐘傳恨處清泪落天涯

輓宜人趙氏

分胄天皇媛來嬪相國孫孝慈山上梓法度澗濱繁鳳
去簫沉響鸞空鏡掩痕家庭熏沐事千古說南軒

輓徐提舉

人品真豪爽天姿尚典刑畫簾深院宇春旆擁郊坰雲
子千艘白鹽烟萬竈青南州高士傳三嘆一彫零

輓蔡祭酒

孝友尊前哲詞章裕後生
栢臺真御史槐市大司成
騏驎風方力餘艣浪忽傾
山寒丹旆急識者為霑纓

輓曹監丞

二首

學渺千江水才雄百尺樓
鳬飛思葉縣燕寢憶蘇州
有感珠還浦無苛虎渡洲
浦江天濶處缺月正如鉤

其二

威鳳方翔漢寒鷗已宿林
平生惟好士無日不揮金
駟

杜頻催駕琵琶遽絕音山名昇白日回首一霑襟

輓錢塘蔡令君

少年思賈誼中壽憶賓王軍政存鍾阜民庸在括蒼馬
蹄歸鳳闕車軸折羊腸喚起青油夢悲風攪白楊

輓王柳州

才華唐令尹名勝晉參軍善政流郴水遺風襲緡雲寶
釵當自合神劍不中分心折白巖路猿吟日未曛

輓楊提舉

風慘琳宮曉雲愁鐵甕春鴻冥方避弋鱸集遽成塵金
虎多遺愛銀菟愧後人尋思漢循吏竹帛逐時新

洛水集卷二十四

欽定四庫全書

洛水集卷二十五

宋程秘撰

七言律

五十六字庸以告未知野夫者

寧須山澤論高平但要曾餐石決明三世擊鐘敲石磬
十年學劍斲銅釘倘知狐祖天邊去肯向蠻奴脚底行
更許野夫尋上着十洲三島一宮城

慶元丁巳十月奉親如臨安宿西菩寺表弟吳克

仁俱焉二首

熙寧相望百餘年又有人如古鉄頑日落尚憐今夕路
月明無恙舊時山朱紅野實堆盤裏粉白詩牌滿壁間
欲為慈顏供一笑更留數語任渠刪

其二

安車未向都門移且攬西菩一段奇路入三腰須種樹
泉流石齒莫開池重來坡老今誰是出世參寥不記時
結束匆匆出門去白雲明月舊相知

用朱經畧韻

歸來南橐舊蕭蕭
但有新詩照佩瑤
峴首溪山歸點染
湘天風月困吟嘲
輕裘詩帥風流在
岳牧詞臣意氣饒
見說玉堂須翰手
公當歸侍紫宸朝

用邱樞密韻

起自澄江應夢求
天還河北百餘州
嵩瀍處士歸羅致
淮蔡奇謀入彀收
午夜金陵瞻斗極
百年梁汴望刀頭
會須再作中興歷
還許諸生執筆不

作堂六桂之東命之曰桂生取漢人招隱篇桂樹叢生之語也詩以記之

幾年列植擅清芳今日標題始作堂
遠向松岡分老蔭近於菊畹借寒香
地雖未離人間世心已全然物外鄉
最好夜來清絕處飛霜帶月下南塘

賀費樞密登卞忠貞公墓

底用荒村訪野墳青編相對儼如存
當年但識清談樂今日方知節概尊
千載腐儒空弔古幾章冷語自消魂

便當僂力清河洛一洗新亭舊泪痕

流觴西湖用范左史韻

畫舫同載若登仙却笑泥羈馬不前要識冷煙催穀雨
須知澹日養花天千條翠柳隨風舞一樹夭桃照水妍
須信人生行樂耳虛名那用世間傳

雪

北風傳信報登平白帝宸遊墮玉英月下草玄疑蜀客
鼎邊得句失軒明莊嚴東閣若為好點綴南枝分外清

惟恨蔡州城北水一池
鶩鴨更無聲

洛水集卷二十五

欽定四庫全書

洛水集卷二十六

宋程秘撰

五言絕句

小憇許由亭

歷數河南去乾坤一草亭一亭猶是累千古盡浮萍

喬松

風細吹吟鳳雷驚起蟄龍幾年卧空谷今日享真封

歲暮

綵帖隄塵濕屠蘇琥珀濃夕陽猶臘日午夜已春風

三月三日度白際

黃尖敝峯名白際嶺名

日望黃尖杪今登白際巔千山皆委地一臂獨擎天

戊子正旦賀壽慈宮二首

曙色浮丹栱春風煖禁街微瀾迷秀石纖草蔭新槐

其二

鳳駕回天仗鵷班集露門須臾趨魏闕杲日正中暎

粥罷

飯已茶三啜隅中粥一盂陶然詠皇化安用東封書



洛水集卷二十六

欽定四庫全書

洛水集卷二十七

宋程秘撰

七言絕句

冰十歲作

白日黃流漲渭城三更風緊盡成冰
莫言此物渾無用曾向滹沱渡漢兵

甘將軍廟

沙寒日薄水雲愁賊魏王吳一夜休
自是英雄元不死

至今猶占大江流

晚發富池

甘王樓下一帆風獵獵
舟旗照日紅
釀酒三江飲
龍腹摩挲冠冕是誰功

昭明太子宮

千章喬木烟蒼蒼
一帙遺文字
字香梁鼎西沉何處問
至今戟手看興亡

陳時栢

陳未亡時栢已蒼風來歷歷說興亡世人元不如喬木
閱盡中原幾戰場

夜雨

玄機初透古人胸每說匡來晚未工珍重芭蕉前夜雨
為傳消息到牆東

築徑

入門一徑小紆回百本芙蓉手自栽寄語後來須善護
三年猶及見三開



觀史有感

紛紛賓客趨驃騎何事任安太樸疎却笑君非王太傅
不容朝士不回車

別金陵官舍雙栢

手自移時尺許長三年拂拂及官牆願言勿負栽培力
保此堅貞傲雪霜

復朱教授

某前雪蒙佳句再雪乃得為謝信矣
相如之思遲也然亦遂為一段公案

詩成催雪豈無功今果裝嚴七寶公休說春花那解舞

也教耳熟慰新豐

其二

朝來照眼百瓊瑰為有詩筒打雪來不止梁園許分簡
詩壇高築比雲臺

送李侍郎安撫浙東

二首

通明殿上紫芝仙乞得閑身下九天今日都門臨祖處
幾人驚嘆着鞭先

其二

夜來天闕望文昌
移在藩臣斗極旁
千尺濤江元不遠
公當早晚對明光

直廬間賦 二首

一陪鸞鳳入仙臺
四見薰風舞禁槐
自笑平生無夢到
那知今日以身來

其二

紫宸朝退曉光寒
百吏犇曹一吏閒
便可雲卿稱散秩
奈何名籍尚人間

雪霽玉堂曉眺

當年銀界隔鯨江今日分明玉作堂不是瓊林宮樹密
也應白虎接明光

兩炬並花

雙蓮合蕊更開花報道金鑾日未斜已草禁中新鳳詔
趣君十日覲東華

脩玉牒官閣子坐屏甚古詰吏亦不知曷始數語
紀之

摩詰何為留此筆至今雙壁猶崑崙
老松掀甲作風雲
亂石激流殷霹靂

其二

吳絹一幅苦無多中涵太華及黃河
偶然乘風山下坐
紫烟翠靄坐中過

早入

紫薇浥露翠條深捷捷靈鳥振好音
全似冰巖亭上坐
四屏煙靄奏春禽

直廬多暇新綠鬱然信筆二絕

朝絕倖恩除目少邊清妖祲檄書希飯餘摩腹間行立
一抹牆東新翠微

其二

壁右方壺浸碧天依然全似太湖邊清風一夜生新興
好把漁竿上釣船

江上道中瀑布

松風一壑偈人寒老石琤琤響碧湍疑是銀河天不鎖

瀉從雲際下人間

梔花

青琅削葉玉花鈿獨占炎皇第一天
未羨冰桃垂夏後且看金子繁秋前

朱生論天

不知占得幾躔星閱盡人間聚散萍
今日重來橋上望依然楊柳兩行青

為釣魚作

人道秋風長桂時
天台散種未為遲
如君算到白榆窟
揀取南來第一枝

擁爐

已甘灰冷竹窓前
那意移來近繡氊
唯有幽人一寒暑
閉門高卧雪深天

中秋無月

嘗時斗暗猶閒事
無月中秋可若何
我欲梯雲千萬丈
取光還月謝羲娥

春帖

輕烟薄霧鎖平川全似江南二月天昨夜溪頭新雨過
分明洗出太平年

程掌書二首

夜來踏月過臨川水面粼粼挂魄圓此際高人方熟寐
難為一扣綠筠軒

其二

分明如夢縞玄衣傍月凌風自在飛夢覺出門都不見

不知已上子陵磯

此行專看釣石

孟夏廿一東作秩然

不見東耕四十年茲晨蓑笠去翩翩從今數過三稔朔
史筆當年大有篇

五鼓夢中作覺而成之 二首

人生萬幻一麾輕須築銅駝萬里城莫道斜陽光不遠
斷霞收盡十分明

其二

當時千駟已無聞寧說牛羊上塚行同是博陵評古者
肯令千載尚齟卿

閏九十四

午夜青衣海上還八年兩度雪封山如今一水平如鏡
好釣桐江五百灘

送松煤十九與葉秀才

雲溪深處萬松林煙起晴天自作塵根向九華分結處
與君同是墨仙人

出南郊清甚

春風吹屣到南園
着酒塗酥花正繁
更喜滿前無俗物
橫塘疎竹渭南村

輓太府丞知徽州韓公

翊運勛臣第一家
却於翰墨掇英華
誰知忠孝千年事
不逐春風落水花

魯國夫人薤露歌

並海名山萬疊開
大慈太白等蓬萊
自從齊國鋤雲後

又見夫人駕鶴來

洛水集卷二十七